



*Selasa, 28 Maret 2023*  
**Ogen: LUKAS 1:46-56**



**Nden-Nden Pujin Maria**



**R**ende tanda meriah ukur. Ban riahnya ukur Maria rende ia sanga ia i rumah seninana Elisabet. I bas perjumpanna ras seninana e, idatken Maria sada bukti maka si jadi i bas bertinna e me kuasa Dibata. Kearun atena piga-piga paksa si lewat erkiteken mehuli kulana alu la iangkana, i bas waktu si kentisik mobah erkiteken seninana si kin ndehara sekalak imam, nggo naksiken maka anak i bas bertinna pe ranjak, ersurak sanga ibegina sora Maria i bas jabu e. Si jadi respon Maria arah pergegeh si alokenna i bas Elisabet nari e me rende, ipenangkihna ende-enden si seh kal ulina man Tuhan. Kai isi nden-nden Maria e, mari si perdiatken isi Pustaka si Badiana. Sipemena (ay. 45-48), Maria muji-muji Dibata erkiteken perbahanenNa si mbelin man Maria ras Elisabet. Ia natang tuah arah kuasa Kesah, bage pe i bas ertahun-tahun nggo mandul, Elisabet pe bas perjumpanna e sangana ka natang tuah. Tuhu-tuhu mbelin kuasa Tuhan, la terukuri nalar manusia biasa, e maka tendi pe ersurak ban megahna kuasa Dibata i bas geluhna. Sipeduaken (ay.49-53), Maria muji Tuhan erkiteken kebadian, perkuah ate bage pe kerna kuasaNa si itujukenNa man kalak si malang baNa. Tuhan ndahiken dahin si badia, ngukum si perdosa, korup, meganjang ukur bage pe kalak bayak si la mperdiatken temanna si deban. Sipedelukan (ay.54-56), Maria mujiken Tuhan si setia nandangi padanNa ras bangsaNa, bagi enggo ipadankenNa man Abraham, Ishak ras Jakup. Maria tek maka Tuhan tetap erdahin guna nampati kegeluhen bangsaNa. Pujinta man Tuhan nuduhken kerna asa ja kinitekenta man Tuhan ras seh i ja penandaita kerna IA. Bagi Maria si ersura muji Tuhan erkiteken pengalamenna jumpa perbeben bage pe perjumpanna ras Elisabet. Kita pe banci muji Dibata arah pengalaman geluhta si teptep wari. Penandaita si payo man Tuhan mahanca mata kinitekenta aktif seh maka siidah teptep wari tanda kuasa Tuhan si mbelin man banta. Seh maka penandaita si payo nandagi pasu-pasu Tuhan e njemba kita lalap ngataken bujur man Tuhan. Rende puji ia. Janah pujin si mehulina, melodi si terindah labo saja nada-nada si ndarat arah kalah-kalahta tapi arah lagu kegeluhen si dem pengataken bujur ras cirem siang ayota. IA erdahin man banta secara pribadi ras erdahin sue ras keperlunta si sentudu ras sura-suraNa.

*Tuhan ngenca patut ndatken pujin si mehagana arah kita, tinepaNa.*